

Azaroaren 8an
URTEAN ZEHARREKO 32. IGANDEA

Elizbarrutiaren eguna

Agurra

Jesu Kristo gure Jaunaren bakea izan bedi zuekin.

Sarrerako oharpena

Igandea ospatzera bildu gara senideok. Kristauok ezin dugu bizi iganderik gabe, Jaun berpiztuaren eguna ospatu gabe. Eta ospakizun hori Elizan, elkartearen batasunean ospatzen dugu: Jauna noiz etorriko elkarrekin itxaroten dugula.

Gaur, Elizbarrutiaren eguna dugu, goiburu honekin: “Zuri esker gara garena”. Gure eliz batasunaren alde otoitz egin, gure ahalegin eta jardun guztientzat argitasuna eskatu eta Elizbarrutiaren beharretarako diru-bilketa egiteko.

Damu-otoitza

Presta gaitezen zeruko mahaia aurreratzen digun otordua ospatzeko, Jaunaren barkamena eskatuz.

—Jesus Jauna, gure sal**bat**zaile zarena. Erruki, Jauna.

—Jesus Jauna, gure ask**kat**zaile zarena. Kristo, erruki.

—Jesus Jauna, gure bit**art**eko zarena. Erruki, Jauna.

Erruki dakigula Jainko guztiz ahaltsua, eta, gure bekatuak barkaturik, eraman gaitzala betiko bizira.

Otoitza

Jainko ahalguztidun errukitsua,
 urrundu gugandik eragozpen guztiak,
 gorputzez eta arimaz geure buruaren jabe izanik
 askatasun osoz zure nahia bete dezagun.
 Zure Seme Jesu Kristo gure Jaunaren bitartez,
 Zurekin eta Espiritu Santuarekin batean
 Jainko eta Errege bizi baita gizaldi eta gizaldietan.

Hitzaren liturgiari oharpena

Jainkoa jakinduria dugu. Jainkoa argi-emailea dugu, eta erakargarria, baina inoiz ez gaitu zapaltzen, gure askatasuna indartzen baizik. Onar dezagun bere hitza, barnetik berri gaitzan.

Lehenengo irakurgaia (Jak 6, 13-17)

Jakinduriaren liburutik

Distiratsua da jakinduria, ezin zimeldua; hura maite dutenek erraz ikusten dute bera, eta erraz aurkitzen haren bila dabilzanek. Irrikatzen dutenei, aurrera datorkie; bera lehenik azaltzen zaie. Haren bila jaikitzen dena ez da nekatuko; bere atean eserita aurkituko baitu. Hura gogoan erabiltzea, jakinduria betea da; harengatik esna dagoena laster izango da kezkarik gabe. Inguruka dabil, bera maite dutenen bila; bideetan aurpegi alaiz agertzen zaie, eta asmo guztietan bidera ateratzen.

Erantzun-salmoa (Sal 16, 1. 5-6. 8 eta 15)



Zu - re e - ga - rriz dau - kat go - go - a, Jau -



na, e - ne Jain - ko - a.



Jainko, nire Jainko zaitut,
goizetik bilatzen zaitut,
zure egarriz daukat gogoa, zure irrikaz haragia,
lur idor, egarri, urgabe iduria. R/.

Egona nauzu Zuri begira jauretxean,
zure ospea eta indarra ikusi nahian.
Bizia baino hobea baita zure maitasuna,
ezpainok egingo dute zure goralpena. R/.

Goretsiko zaitut bizi naizen artean,
jasoko ditut eskuok zure izenean.
Gurinez eta mamiz bezala beteko zait gogoa,
ezpain-ikaraz goretsiko zaitu nire ahoak. R/.

Zutaz oroitzen naiz ohe gainean,
Zu gogo ematen zaitut gauean.
Zu gertatu baitzara nire laguntzailea,
pozez oihu dagit zure hegal-itzalean. R/.

Bigarren irakurgaia (1 Ts 4, 13-18) *Gako [] artekoa utz daiteke*

San Paulo Apostoluak Tesalonikarrei

Senideok: Hildakoetaz zuek ezjakinean egoterik ez dugu nahi, goibel ez zaitezten, itxaropenik ez duten beste horien antzera. Jesus hil eta biztu zela sinesten dugun bezala, Jesusengan hil direnak ere, Jaungoikoak Harekin batean Bereganatuko ditu.

[Jaunaren hitzez diotsuet nik: bizi garenok —Jaunaren etorrerako geldituok, alegia—, ez diegu hil direnei aurrea hartuko. Jauna bera, goiaingeru oihuz eta turutotsez, deika jaitsiko da zerutik; eta aurrena, Kristorengan hilak biztuko dira; gero gu, oraindik bizi garenok, haiekin batean, lainoetan gora Jaunaren bidera eramango gaituzte.

Eta horrela beti Jaunarekin egongo gara. Poztu ezazue, beraz, elkar hitz hauekin.]

Aleluia (Mt 24, 42a. 44)



Zaudete erne,
 uste ez duzuen orduan etorriko zaizue eta
 Gizonaren Semea. R/.

Ebanjelioa (Mt 25, 1-13)

Homiliarako argibideak

Gure azkenari begira

Gaurko ebanjelioak oinarrizko egia hau gogorarazten digu: gure bizitza senarrari itxarote bat da. Eta bizitzaren une nagusi hori, heriotzan gertatuko da, ez dugu ahaztu edo baztertu behar hori, prestatu baizik. Gaur izan daiteke egun ona horretarako. Gainera, bigarren irakurra, hil ondoren zer gertatuko zitzaizen kezkatuta zeudenei erantzuten die Paulok. Gu ez gara horretaz asko kezkatzen, behar bada, beste muturrean gabilta: ez dugu horretan pentsatu ere egiten. Eta heriotza gure bizitzatik ezkutatzea ez da ona. Gizatasuna kentzen dio gertakari garrantzitsu horri. Hoztasuna ematen. Kristauok beste era batera bizi behar genuke heriotza.

Heriotza oroitzeak helburu hau izan behar luke lehenik: gaitzaren gaineratik, heriotzak hain gordin agertzen duen giza ahultasunaren gaineratik, bizi betea ematen digun Jainkoaren maitasuna dagoela

konturatzea. Tesalonikarren desioa horixe da: Jaunarekin betiko egotea; Jainkoaren egarria da gure bizitzaren ortzemuga osatu behar lukeena.

Giro horretan hartzen du indarra eta zentzua gaurko ebanjelioak egiten duen deiak, bereziki, birjina zentzugabeei egiten dien deiak.

Ezkon-bazkari hura gertakari erabakigarria den: guretzat, Jainkoaren erreinuaren betetasuna irudikatzen duen sinbolo ederra gertatzen da. Gezurra dirudi, honelako gertakari ederra pasatzen utz dezakeen jende zentzugabea egotea: argia eman behar duen oliorik gabe jendea ibiltzea, bizitzan lo hartzen duen jendea; une berezi eta ederraren zain arretaz eta erne biziko ez den jendea egotea... bai penagarria! Senargaiaren zain atean egongo ez den jendea...!

Jesusek galdetu digu, azken finean, berarengan eta bere Erreinuarengan federik badugun. Sinesten badugu Beraren zain biziko gara. Sinesten badugu, gure bizitza osoa ontziak olioiz betetzen igaroko dugu, ahalik eta argitsuen izateko. Kontura gaitezen: Jesusek gaur darabilen eredu ez da negatiboa (zerbait egitea galerazten diguna "bekaturik ez egitea" eskatzen diguna), jarrera aktiboa eskatzen digu: ekin, egin, gure bizitza martxan jarri, olioia bildu. Datorren igandean zehaztuko zaigu arretarako dei honen bidea eta Kristo Errege egunez konturatuko gara zer den argitzen gaituen olioia.

Lehenengo irakurgaiak osatu egiten digu jakinduria handiz ebanjelioko irakaspena. Ezin da aitzakiatzat hartu oliorik ez edukitzeko, olioaren beharra ez ezagutzea, ez jakitea. Bihotza ebanjelioaren zerbitzura apal jarri duenak badu jakinduria aski argiaren beharraz jabetzeko eta argirako bidea prestatzeko.

Jainkoaren herriaren otoitza

Egin dezagun otoitz gizaki guztien alde, inoiz falta ez dezaten gure eskuzabaltasuna:

- Eliza barne-bakez bizi dadin beti, honela Ebanjelioaren testigu gartsu izan dadin eta Jauna erdian izateaz poztu dadin. Eska diezaiogun Jaunari.
- Herrietako arduradunei eman diezaiela Jaunak jakinduria eta zuhurtasuna, guztien ongizatearen alde jarduteko. Eska diezaiogun Jaunari.
- Munduan gehien sufritzen dutenak beren ezinetatik arinduak aurki daitezten. Eska diezaiogun Jaunari.
- Guk guztiok, kristau eran jardun dezagun gure eginkizun guztietan, gure lanek fruitu onak eman ditzaten. Eska diezaiogun Jaunari.

Jauna, atseginez begiratzen diezu Zure jakinduria maite dutenei, eta Zure bila dabilzaneie zeure burua agertzen diezu; entzun gaitzazu eta egizu Zure Semearen ezkon otordurako gai izan gaitzela, eta gure kriseiluak itzali gabe atera gaitzela Bere bidera. Errege bizi baita gizaldi eta gizaldietan.

Eukaristiaren liturgiari oharpena

Orain egitera (*edo egiten den unean*) goazen diru-bilketa Elizbarrutiaren beharretarako izango da.

Jaunartze-ondorengo otoitza

**Zure dohainez janariturik, eskerrak ematen dizkizugu, Jauna,
eta zure bihotz onari eskatzen diogu,
sakramentu honetan eman diguzun
Espiritu Santuaren indarrak
iraun dezala gugan
eta eman diezagula leialtasunean bizitzeko grazia.
Jesu Kristo gure Jaunaren bitartez.**